

甘泉鄉人稿

甘泉鄉人稿卷九

嘉興錢泰吉輔宜

曝書雜記下

余少時所閱家語及韓詩外傳往歲兒輩命工重整不能手裝也庚戌夏秋之交曝書及之因憶陸放翁渭南集有其先人裝背京本家語跋云余舊收此書得自京師中遭兵火之餘一日於故篋中偶尋得之而蟲齧鼠傷殆無全幅綴輯累日僅能成帙乃命工裁去四周所損者別以紙裝背之遂成全書嗚呼予老嬾日昏雖不更讀然嗜書之心固未衰也後世子孫知此書得存之

如此則其餘諸書幸而存者爲余寶惜之紹興戊午十月七日雙清堂書放翁跋其後云後五十有七年又脫壞不可挾子聿亟裝緝之持以相示方先少保書此時某年十四今七十矣不覺老淚之濡睫紹熙甲寅閏月四日第三男中大夫某謹識以竹汀宮詹所輯放翁年譜考之是年子聿裁十八歲放翁又有跋子聿所藏國史補云子聿喜蓄書至輟衣食不少吝也吾世其有興者乎爲嘉泰壬戌子聿年二十六其後編次校刊放翁詩文者亦子聿也夫人之志趣定於少時所向得正乃能至老不移若保愛舊籍累世勿墜則門風之盛勝於

繼踵三公矣錄之爲兒輩勸閱數日得應溥以拔貢

朝考蒙

恩點用七品京官之信偶讀老學庵筆記劉韶美事云  
劉韶美在都下累年不以家行得俸專以傳書必三本  
雖數百卷爲一部者亦然出局則杜門校讎不與客接  
既歸蜀亦分作三船以備失壞已而行至秭歸新灘一  
舟爲灘石所敗餘二舟無他遂以歸普慈築閣藏之因  
錄寄應溥而語之曰得俸購書杜門謝客吾兄衍石翁  
官京邸時實如此能守家風乃可希蹤先哲也數年來  
友朋每勸余續纂曝書雜記忽忽未暇應溥既分隸選

曹乞假暫歸炳森亦將入都候補教習家藏數十匱自此與若曹日遠矣因連綴前語以爲重次曝書雜記發端庚子春嘗從書錄解題纂輯陳直齋生平遂錄以爲第三卷之首後有所得將次第錄寄京師俾輒紅塵中不忘冷齋況味吾家清白之傳庶幾稍延歟咸豐改元上元日六十一翁識

陳直齋嘗知嘉興余旣據宋詩紀事養新錄載之前卷矣茲讀書錄解題尋求其生平事迹蓋嘗分教鄞學宰南城倅莆田而其先世亦略見謹條錄如左以備考證  
浮沚先生集十六卷後集三卷祕書省正字永嘉周

行已恭叔謨十七入太學有盛名師事程伊川元祐六年進士爲博士太學以親老歸教授其鄉再入爲館職又出作縣永嘉學問所從出也鄉人至今稱周博士集序林越謨言爲祕書郎則不然先祖妣先生之第三女先君子其自出也故知其本末所居謝池坊有浮沚書院

卷十七

濟溪老人遺稿一卷通判明州濟源李迎

彥將謨永嘉周浮沚先生之壻與先大父爲襟袂集中有送先君子赴戊子秋試詩首句籍甚人言易已東蓋先君治易故也

卷十八

丁永州集三卷知永州吳興

丁注葆光謨有女適樂清令富春李素見素先妣之大

父母也

卷十七

愚未冠時無書可觀雖二史亦從人

借嘗於班書志傳錄出諸詔與紀中相附以便覽閱既仕於越乃得見林氏書而樓氏書近出

卷五東漢詔令

往在鄞學訪同官薛師雍子然几案閒有書一編大

略述三山一郡財計薛曰外舅陳止齋修圖經欲以爲

財賦一門後緣卷帙多不果入因借錄之書無標目以

意命之曰三山財賦本末及來莆田爲鄭寅子敬道之

鄭曰家有何一之長樂財賦志豈此耶借觀之良是

卷

五

國紀不大行於世鄞學有魏邸舊書傳得之

卷四

琴譜鄞學魏邸舊書有之已卯分教傳錄亦益以他

所得譜

卷十四

九經字樣一卷往宰南城出謁有持

故紙鬻於道者得此書乃古京本五代開運丙午所刻也遂爲家藏書籍中之最古者

卷三

爾雅新義頃在

南城傳寫凡十八卷其曾孫子通所刻於嚴州爲二十

卷

同上

參同契分章通真義三卷明鏡圖訣一卷曩

在麻姑山傳錄

卷十二

玉蟾者葛其姓福之閩清人

嘗得罪亡命蓋姦妄流也余宰南城有寓公者稱其人

云近嘗過此識之否余言不識也此輩何可使及吾門

李士甯張懷素之徒皆殷監也是以君子惡異端

卷十一

仙珠

龐氏家藏祕室方南城吳炎晦父錄以見遺

卷十



三 龍髓經至二十八禽星圖以上七種并前諸家多

吳炎錄以見遺江西有風水之學往往人能道之雜相  
書凡二十三種又有拾遺亦吳晦父所錄 卷十二 雪

巢小集東魯林憲景思譔余爲南城其子遊謁至邑以  
家集見示愛而錄之及守天台則板行久矣視所錄本

稍多 卷二十 邠志三卷從盱江晁氏借錄 卷五 梁

谿易傳莆田鄭寅子敬從忠定之曾孫得其家藏本頃

倅莆田日借鄭本傳錄 卷一 後魏國典從莆田劉氏

借錄 卷五 三朝訓鑑圖十卷頃在莆田有售此書者

亟求觀之則已爲好事者所得蓋當時御府刻本也卷

爲一冊凡十事事爲一圖飾以青赤亟命工傳錄凡字  
大小行廣狹設色規模一切從其舊斂衽鋪觀如生慶  
厯皇祐閒目覩聖作明述之盛也

卷五

獨斷向在莆

田嘗錄李氏本

卷六

夾漈家傳一卷所著書目附莆田

鄭翁歸述其父樵漁仲事跡樵死時翁歸年八歲安貧  
不競頃佐莆郡時猶識之

卷七

元和姓纂絕無善本

頃在莆田以數本參校僅得七八後又以蜀本校之互  
有得失然粗完整矣

卷八

晉陽事跡雜記從莆田李

氏借錄

同上

番陽雜記莆田借李氏本錄之

同上

雲笈七籤頃於莆中傳錄纔二冊後於平江天慶道藏

得其全錄之

卷十二

舊見沙隨程迥所記南渡諸人

以易林筮國事多奇驗求之累年寶慶丁亥始得之莆

田恨多脫誤嘉熙庚子從湖守王寺丞侑借本兩相校

十得八九

同上

集選目錄二卷莆田李氏有此書凡

一百卷力不暇傳姑存其目

卷十五

蔡忠惠集余嘗

宦莆至其居去城三里荔子號玉堂紅者正在其處矮

屋欲壓頭猶是當時舊物歐公所撰墓誌石立堂下真

蹟及諸公書帖多有存者

卷十七

武元衡集初用莆

田李氏本傳錄後以石林葉氏本校

卷十九

天台山

記一卷余假守臨海就使本道嘉熙丙申

按丙申爲端平三年明年

丁酉乃爲嘉熙元年此作嘉熙丙十月解郡符趨會稽  
申誤文獻通考亦同今仍原文

治所道過之銳欲往遊會大雪不果改轅由驛道至今  
以爲恨偶見此記錄之以寄臥遊之意 卷八 造化權

輿六卷余求之久不獲已亥歲從吳門天慶觀道藏中  
借錄 卷十 景祐天竺字源吳郡虎邱寺有賜本如新

己亥歲借錄 卷十二 白氏年譜維揚李璜德劭所作

余嘗病其疎略抵牾且號爲年譜而不繫年乃別爲新  
譜刊附集首 卷十六 白集年譜一卷知忠州漢嘉何

友諒以居易舊治旣刊其文集又作年譜刊之集首始  
余爲譜旣成妹夫王栴叔永守忠錄寄之視余譜詳略

互見亦各有發明

同上。陳直齋事跡

晁子止郡齋讀書志爲宋以來著錄家之首其所著易書詩春秋解南充游氏謂嘗有鈔版今已失傳昭德文集六十卷見於文獻通考而陳氏書錄解題不列其目蓋當時已鮮傳本其弟公遡嵩山居士集今猶列於

四庫文集之傳否殆有數焉子止於其五世祖文元所著法藏碎金得之於趙郡蘇符昭德新編得之於丹稜李燾道院別集得之於知閬州王輔毫智餘書得之於眉山程敦厚理樞得之於澠池集中

此段衢本在道院別集條下袁本無

蓋兵亂焚棄之後遺著僅存雖有賢子孫亦賴有人傳

錄乃得訪求也

晁子止昭德文集

郡齋讀書志有二本鄱陽黎安朝刊於宜春郡齋者分

四卷益以趙希弁家藏爲附志一卷

繫於四卷之後其第五上第四下其

後趙氏從三衢本摘補四百餘部爲後志二卷世所通

行謂袁州本也三衢本爲姚應續所編南充游鈞刻於

信安郡齋分二十卷文獻通考所據本也世所罕見嘉

慶己卯吳門汪士鍾闔原得舊鈔本屬吾鄉李香子明

經詳校刊行頃讀顧澗蘋集知瞿木夫有衢志考辨論

袁本之失明衢本之得惜未見傳刻余於兩本異同未

暇細校偶檢麟臺故事條下衢本有予所藏書斷自南

渡之前獨此書以載官制後事爲詳故錄之云云此晁氏著錄大凡也袁本無之亦優絀之端也汪氏所刻衢本小學類淵贊謂有錯簡當據以正之

郡齋讀書志袁

本衢本

衢本讀書志序文於贈書之人但稱南陽公不著其姓陳氏書錄解題謂南陽公未知何人或云井度憲孟也則所見讀書志亦衢本也袁本序文作南陽井公趙氏希弁後志序明言井晁二家蓋袁本晚出馬氏陳氏皆不及見故文獻通考於附志未嘗采錄晁氏於宋書條下云嘉祐中以宋齊梁陳魏北齊周書舛謬亡闕始詔

館職讐校曾鞏等以祕閣所藏多誤不足憑以是正請  
詔天下藏書之家悉上異本久之始集治平中鞏校定  
南齊梁陳三書上之劉恕等上後魏書王安國上周書  
政和中始皆畢頒之學宮民間傳者尙少未幾遭靖康  
丙午之亂中原淪陷此書幾亡紹興十四年并憲孟爲  
四川漕始檄諸州學官求當日所頒本時四川五十餘  
州皆不被兵書頗有在者然往往亡闕不全收合補綴  
獨少後魏書十許卷最後得宇文季蒙家本偶有所少  
者於是七史遂全因命眉山刊行焉讀此一條知并公  
收刊史籍之功亦甚巨錄之以見雖館閣校定之書頒



行學宮亦易闕失必賴傳錄收集之人也

南陽井公

趙氏希弁後志序謂衢本缺杜鵬舉序余所藏陳氏傳刻袁本亦無杜序昨歲胡澄齋贈余舊鈔本有之得補錄焉大略謂先生校井氏書爲讀書志凡四卷鵬舉作邑峨下望先生滄洲之居雞犬相聞暇卽問奇字於古松流水之閒一日叩以此書忻然相付因廣其傳云云結銜稱門人承議郎奏辟通判茂州軍州事賜緋杜鵬舉序

讀書志杜鵬舉序

平湖家夢廬翁天樹篤嗜古籍嘗於張氏愛日精廬藏書志眉閒記其所見猶隨齋批注書錄解題也余曾手

鈔翁下世已有年平生所見當不止此錄之以見梗概  
小重山館胡氏得郡城陳氏所藏陳大猷書集傳十  
二卷是元槧本惜缺葉甚多讐校頗難擬重刻而未果  
黃諫書傳集解內所引陳大猷書集傳大可補小重  
山館所藏缺文 纂圖互注毛詩昔藏吳門讀未見書  
齋書友攜來曾一寓目 呂氏家塾讀詩記蕭山陸氏  
藏宋版配入元版者余曾見之 劉克詩說吳門汪閻  
園重摹影宋本頗精內多第二卷是余從郡城陳氏借  
鈔不全前六卷一冊第二卷在焉鈕非石借去刻入余  
有跋亦刻入 徐秉義詩經識餘戊戌四月十八日吳

門西山堂書坊邵枕泉來言有不全一部正是書所缺之十七卷已爲豐山馬笏齋購去 儀禮疏吳門汪氏有新刻本甚精從黃氏所藏宋刻影摹 禮記月令巾箱本常熟張□□藏宋印大字本亦只存月令一卷不識與此本異同若何 論語集解日本舊鈔本近日日本有刻本不識與此有異同否 龍龕手鑑昔年書友顧姓攜遼板大字本余慙慙小重山館主人購藏不果 集韻同里丁日扶藏有天一閣范氏影鈔本視曹氏所刻後序多一葉然尙缺尾數行也影摹甚精善有范氏收藏印記 史記殘本蜀大字本此不全本三十卷

今藏小重山館胡氏 三國志殘本郡城金氏藏單吳  
志宋版甚精 陸狀元通鑑詳節此本余數十年前書  
友攜來曾一見之索值甚昂不能得至今縈之夢寐其  
紙質緊薄光潤如玉墨色弈弈撲人眉宇乃宋版宋印  
之至佳者 奉天錄余託張撝庵先生從李鄒齋方伯  
令嗣借來上有孫平叔先生朱筆批鈔竣送還李公子  
已謝世傷哉是本願老榮從余傳錄者 孔氏祖庭廣  
記滬上李筍香曾藏金刻今爲馬笏齋所得 漢丞相  
諸葛忠武侯傳余十八九時杭州書友陶姓攜來宋版  
宋印一冊裝作摺疊冊子上多宋元人藏印俱係真蹟

後歸吳門黃氏今在汪閬園家 國朝名臣事略前年  
吳門書友胡寅生攜真元槧初印本余屬小重山館購  
藏不果後爲豐山馬笏齋購去戊戌立夏前一日記  
吳郡志朱刊配舊鈔本此書是余舊藏雖係宋版字已  
漫漶大約是元末明初印本 吳郡志毛刊校宋本此  
本亦曾寓目 咸淳臨安志近日武林汪小米有刻本  
第六十四卷以他書補入 嘉禾志五六年前有書友  
葉姓攜明刻本求售後晤陳蘭陵大令云曾見之其字  
頗大因有舊鈔校本未及購真可惜也 會稽三賦曾  
見宋版大字本爲吳授琴所得授琴久歸道山此書不

知尙在否不甚清朗未必是宋印也 太平寶訓政事  
紀年此書余從同里陳氏簡香齋借錄其副此從余家  
所藏鈔出者 荀子小重山館藏宋巾箱本內有缺葉  
精鈔補全舊爲商邱陳氏物余作緣而得之者 重校  
證活人書余昔藏朱版活人書中缺三卷吳門黃蕘圃  
於蔣氏得之寄贈遂成全璧今在豐山馬笏齋明經處  
或云在馬二槎處 天文會元占常熟張芙川處藏有  
北宋鈔景祐乾象新書十二卷內有引此書可錄出以  
補其缺 芥隱筆記小重山館藏宋版殘本以舊鈔補  
全者後有黃蕘翁跋從常熟張芙川處購得 卻掃編

余舊有宋版宋印是季滄葦物後歸崑山傳是樓兩家書目俱載之并有收藏印記只有仲立自序而無邵跋毛氏刻入津逮祕書者仲立自序亦刪去後有一行云臨安尹家書籍鋪印行黃蕘翁曾借觀有詩并跋今在海昌馬二槎處仕學規範新篁里張叔未解元藏有宋刻宋印本紙墨如新惜有缺卷是明初袁忠徹所藏并有印記從魏塘查氏得之乃初白先生後人也太平御覽殘本余昔藏有宋版小字本一冊紙墨甚精冊府元龜殘本此書全本余曾見之雖出宋版宋印刻手不甚精玉海同里吳菰圃宮保藏有元版初印者

白紙甚厚允爲玉海所見本之冠惜卷端僞添藏印纍  
纍 東齋紀事余昔藏舊鈔十卷足本與解題所載同  
嵇中散集余昔有明初鈔本卽解題所載本多詩文  
數首此或卽明黃省曾所集之本歟 禪月集曾見吳  
門陳氏葦汀藏列朝詩文集目有白蓮集三十卷訪求  
得之鈔其副本與解題載三十卷同文集五卷久已失  
傳所存惟詩集廿五卷耳 伊川擊壤集常熟張芙川  
藏宋版不全本內有舊鈔數葉余定爲王雅宜手筆後  
以新鈔及明初刻本配全 山谷大全詩注殘本余昔  
藏有宋版一冊卷第忘之矣顧老榮購去配入此部內



梁溪先生文集此集向來傳鈔亦希余從王蘭泉先生哲嗣菱溪處鈔錄其副儲藏家大半從余處傳鈔

石林居士建康集余昔藏有曹秋岳手鈔本後有禾中金轡亭跋今不知流轉何所 箋注簡齋詩集余向有宋版不全本十餘卷今亦散去後無無住詞不識與此同一版否 龜溪集書友鄭姓攜有宋版宋印者前失目錄及序文又有明刻本與宋版行款同曾見竹垞藏鈔本行款亦與宋版同張序之前尙有李彥穎一序 太倉稊米集胡氏小重山館藏舊鈔一部內有刻本一葉傳是宋版余細審恐未必然大約是明初刻本耳

方是閒居士小稿海昌蔣夢華曾藏元刻初印本甚精今在馬笏齋處友林乙藁余舊藏明刻摹宋本甚精聞吳門黃氏有宋版惜未得寓目今在汪闔園家鐵庵方公文集小重山館有明正德閒所刻大字本妙甚元張文忠公集傳聞有新刻本未見秋澗先生大全集秋澗集古鹽張氏藏有元刻本是季滄葦藏後有滄葦硃筆標識并印記二十年前同家□□訪主人得一見之更有宋版琴趣外編乃歐陽文忠黃山谷秦淮海三人之詞稿也更有宋版賓退錄內有缺葉將明刻配全今□□喬梓相繼下世已三載且無後人思之

不禁悵然此集有明刻本小重山館有之亦從古鹽得  
來不及元版遠甚黃文獻公集數年前書友倪朗峰  
攜黃文獻外集八卷是明刻本惜未及購東維子集  
是書昔藏余家前所缺八卷屬林君口椒補全後歸愛  
日主人北宋刊本文選是書今在張芙川處丁酉夏  
寄來屬余作跋因獲觀三蘇先生文粹是本舊藏余  
味夢軒中白紙大字頗精好端平重修皇朝文鑑是  
書明刻各本錯謬不可枚舉第一篇梁周翰五鳳樓賦  
已有數處臺卑者崇屋卑者豐明刻各本脫去屋卑者  
豐一句緣宋版此兩句作小字雙行所以致誤耳芙川

藏有不全宋版本因得一讀所以知之此係葉文莊從  
宋本影鈔亦可稱善本矣所謂下真蹟一等者 兩漢  
策要汲古閣藏本有新摹刻甚精余曾有之審其字形  
確有松雪筆意卽非松雪亦是同時學趙好手所爲也  
禹貢山川地理圖小重山館藏有宋版宋印者紙墨  
相發古香撲人眉宇真祕笈也內圖三十種細審之竝  
無所缺序內云三十一圖必是誤筆 文淵閣本其圖  
從永樂大典補入徐氏經解所刻只總圖二葉耳徐氏  
本有歸震川跋知震川亦未見全圖也 京本詳增補  
注左氏博議小重山館有宋末元初本 分類補注李

太白詩小重山館主人見示元版初印本紙墨甚精售者索值過昂未及購 會昌一品制集此集昔藏余家

類編增廣黃先生大全文集此書舊藏余家後轉售

於黃蕘翁今聞張氏已轉售於其同里瞿氏 文苑英

華纂要此書吳門書友邵松巖攜來得觀家夢廬翁記所見舊本書

庚戌冬假親家沈曉滄同知所藏江都秦氏刻列子唐

盧重元注八卷爲海昌許穆清心梅錄王惕甫評點本

頗精潔心梅游幕江南與曉滄善歿後遺書散失曉滄

從上海郁氏得之潘稻孫語余嘗至吳門見心梅佐幕

之暇手不釋卷久客於外年未中壽鄉里鮮知之者

許

穆清錄王惕甫評點列子

秦氏刻盧重元注列子蓋得於金陵道院坊閒所刻道藏目錄僅有林希逸口義江適解宋徽宗御注高守元集解殷敬順釋文盧注及張湛注均未著錄秦氏謂張湛注殷敬順釋文宋碧虛子陳景元補其遺道藏目錄亦僅錄陳景元南華真經章句音義及章句餘事而無列子則所見不全矣朱述之謂盧注在高守元明刻張沖虛至德真經四解中湛注附殷氏釋文淆亂不可辨別道藏有釋文單刻本惜未能借校盧重元注列子

蕭山汪氏繼培從錢塘何夢華元錫得影宋鈔本列子

張湛注又錄釋文專本於吳山道藏刻於湖海樓注及  
釋文各自爲卷興化任氏大椿從淮瀆廟道藏得殷氏  
釋文刻於燕禧堂附考異一卷汪氏所刻在任氏後而  
不及參校殆未見印本惜宋陳景元補遺皆不分別於  
殷氏元本猶未見真面也兩刻唐鏡香茂才仁壽皆收  
藏

列子釋文

秦氏刻揚子法言駱賓王集呂衡州集皆元和顧澗蘋  
校勘李申耆撰澗蘋墓誌言之列子則不知何人所校  
又所刻李元賓集澗蘋爲之序疑亦校定墓誌不列其  
目則所舉未全也澗蘋嘗校勘唐文粹與英山金近園

同撰辨證鈔校罕觀唐集

語見秦敦夫刻呂衡州集序

惜蜀本六十

家集僅有存者亦未能盡刻也

瀾贊跋蜀本王摩詰集云直齋所稱蜀本六十

家集世無完書大興朱氏椒花吟舫有如干家權載之五十卷嘉慶某年刊行張說之三十卷江都汪孟慈爲余錄其副其餘聞有王子安等而未審他則李太白三十卷康熙中繆氏刊之駱賓王十卷曾在小讀書堆後刊於揚州唐文粹校刊未成瀾贊文粹跋謂胡果泉中丞

嘗得宋刻全部今通鑑文選印本已稀文粹不知爲何人所藏矣

願瀾贊校唐文粹

嘉慶丁卯嘉定李鄴齋方伯廣芸守郡吾禾時屬德清徐君養原校刊盧抱經所校法言李軌注以視秦刻治平監本注文閒有異同音義則秦本增多過半秦本刻



於嘉慶戊寅李公授梓時不及見也秦氏又刻鬼谷子  
陶宏景注三卷附錄一卷乃孫淵如觀察讀道藏於華  
陰嶽廟時所錄本

法言李軌注刻本

顧澗蘋思適齋集十八卷海昌楊芸墅屬上海徐君渭  
仁付梓沈曉滄以印本見寄媵以七古一篇余次韻答  
之集首有李兆洛中耆所撰墓誌云先生從兄之達字  
抱沖亦邃於學而多藏宋元本先生一一訂正之刻列  
女傳以傳當是時孫淵如觀察張古愚太守黃薨圃孝  
廉胡果泉中丞秦敦夫太史吳山尊學士皆深於校讐  
之學無不推重先生延之刻書爲孫刻宋本說文古文

苑唐律疏義爲張刻撫州本禮記嚴州單疏本儀禮鹽  
鐵論爲黃刻國語國策爲胡刻宋本文選元本通鑑爲  
秦刻揚子法言駱賓王集呂衡州集爲吳刻晏子韓非  
子每書刻竟綜其所正定者爲攷異或爲校勘記余以  
集中序跋核之墓誌所列猶未具也淵齋尙有筆記徐  
君欲刻未成

顧淵齋所校書

秦氏鬼谷子有兩刻華陰嶽廟本刻於乾隆己酉後從  
盧抱經得述古堂舊鈔本以正藏本譌脫又刺取唐宋  
書注所引舊注附於本文之下今本亡佚則見他書及  
鬼谷事跡足資參攷者附錄於後重刊一本與列子盧

注並行則嘉慶十年也

鬼谷子刻本

四庫所錄韓非子以明趙氏用賢本校周氏孔教本趙氏本蓋從宋乾道刻本出也嘉慶丁丑吳山尊學士從夏邑李書年漕督得乾道本影鈔付梓願千里舊有識誤三卷以贈山尊山尊則仍歸之千里曰昔蘧爲朱文正師恭跋

御製文及代擬 進御文文正曾以 奏聞退謂其子

錫經必以稿還蘧聽入私集且與蘧書曰一不可掠人之美一不欲亂我之真也詳跋語中亦名臣言行錄之一則也

吳山尊刻韓非子

四庫所錄晏子春秋用明李氏縣眇閣刻本謂視烏程  
閔氏本之移易變亂猶略近古則亦未得善本也孫淵  
如觀察謂萬厯乙酉沈啟南校梓本尙爲完善因據以  
作音義刻入畢氏經訓堂叢書盧抱經羣書拾補卽用  
其本後觀察得元刻八卷影鈔以爲山尊學士六十壽  
山尊遂屬顧千里校梓山尊謂中年早衰春夢久覺思  
彙刻古書以消日月勝於詒癡符而已余今年六十有  
一續輯曝書之記雖誚等詒符然以消日月則愚智同  
之矣

吳山尊刻晏子春秋

陸宣公奏議注

四庫未著錄舊得明神宗丙午公二

十七世孫刑部員外郎基忠所刻翰苑集前有紹興二年迪功郎紹興府嵊縣主簿臣煜所注奏議十五卷進表始知奏疏有注訪求數年不可得後見張氏愛日精廬藏書志有元至正甲午翠巖精舍重刊本其所錄表文與明刻本同張氏據清波雜志知爲郎煜晦之所撰謂表稱至尊壽皇聖帝乃光宗受禪之後紹興當作紹熙予謂表文有發揮於元祐淳熙之盛語則紹興信訛矣明刻亦沿元本之誤也今年五月於吳山書肆見嘉靖乙卯刻奏議十五卷有注制誥十卷無注紙墨精潔急購得之前有新安游震得序但云大中丞周潭汪公

刻之虔臺語不及注卷前亦不錄進表然注文簡明當  
卽郎氏之書宋蔡文子注古文關鍵於三蘇文引郎氏  
注體格與此注同余藏元文類亦翠巖精舍刊或有夙  
緣得見元刻一爲印證歟

陸宣公奏議郎氏注

郎氏嘗輯橫浦日新向讀陳直齋解題云張九成子韶  
之甥于恕所編心傳錄及其門人郎煜所記日新云云  
意謂郎氏爲橫浦門人及見于氏恕心傳錄序云余學  
生郎煜粗得數語纂錄而士大夫已翕然傳誦則郎氏  
似爲于恕之徒然周昭禮清波別志明言晦之早從張  
子韶學必不誣也郎氏進注宣公奏議表結銜爲嵯縣

主簿尙有三蘇文注雖亦罕傳而張氏藏宋刊東坡文集事略殘本二十九卷其上進銜名亦稱迪功郎紹興府嵗縣主簿高氏剡錄成於嘉定甲戌與晦之進書時相距不過二十餘年今檢所列簿治題名無郎煜姓名剡錄世稱佳志晦之學有淵源又能注書以傳不當遺之清波別志謂其累舉得官不霑一日祿而卒郎氏蓋甫授官卽表進所注書旋卽下世未嘗任事故志乘例不采錄也咸淳臨安志有傳而甚略清波別志於其學行稍詳並錄以備考證

臨安志人物傳郎煜事同里張九成嘗編橫浦日新雖從淳熙

十四年特奏得官然甚以儒學知名工部侍郎致仕郎簡字叔廉杭州臨安人性和易喜賓客導引服餌既

老顏如丹晚卽城北治園廬自號武陵居士資政殿學士孫公沔爲守日榜其所居坊曰德壽因以名其所居之橋今俗呼侍郎橋者是也煇友人郎煜晦之亦杭人或謂杭無他郎當與侍郎同諧系晦之曰我家白屋豈可妄攀華胄識者許之晦之嘗注三蘇文及宣公奏議投進未報其用心亦勤矣以累舉得官不霑一日祿而卒可哀也已晦之早從張子韶無垢學已書在第九卷清波別志卷中張無垢貶南安凡十有四年寓處僧舍未嘗出門戶其一話一言舉足爲法警悟後學宏矣其甥于恕哀集語錄十二卷旣已刊行其閒論語絕句讀者疑焉蓋自有論語解亦何假此發明與義嘗叩公門人郎煜煜曰此非公之文也語錄亦有附會者雜志

卷九 ● 郎氏事跡

元廬陵鍾士益嘗因郎氏本爲增注蔣生沐從草廬集錄序文以畀余其略云廬陵鍾士益博綜羣書喜讀奏議各疏事跡始末於每篇之下其所援據亦皆附載繼



之以諸儒之評廣之以一己之說因郎氏舊註而加詳焉鍾氏增注不知尙有流傳否朱述之郡丞屢勸兒輩注宣公集奏議旣得舊注從此加詳似易措手然博綜之學不逮鍾君亦未克成也制誥不聞有注之者草創之學更非淺學所能從事漫記以俟有志者

鍾士益增

注宣公奏議

邵蕙西部郎藏翠巖刻宣公奏議注兒輩得假觀僅有題下注轉不及余所得本之詳或明人刻本乃鍾氏之增注歟壬子首夏蔣生沐從劉氏岳申申齋集錄鍾氏陸宣公奏議注序云余序謂郎氏於奏議不無去取鍾

氏注其全書并及制誥今見明刻本制誥無注則又非  
鍾氏之本矣

元翠巖本宣公奏議注

李氏文選注自明注例散見各篇錄之以爲注釋古書  
之法 諸引文證皆舉先以明後以示作者必有祖述  
也他皆類此

兩都賦序

言能發起遺文以光大業也

論語子曰興滅國繼絕世然文雖出彼而意微殊不可  
以文害意也他皆類此

兩都賦序以興廢繼絕潤色鴻

業注

諸釋義或引後以明前示臣不敢專他皆類此

兩都賦序朝廷無事注

引漢書注云音義者皆失其

姓名故云音義而已

西都賦

石渠已見上文同卷再

見者並云已見上文務從省也他皆類此

同上

婁敬

已見上文凡人姓名皆不重見餘皆類此

東都賦

諸

夏已見西都賦其異篇再見者並云已見某篇他皆類

此

同上

舊注是者因而留之並於篇首題其姓名其

有乖謬臣乃具釋並稱臣善以別之他皆類此

西京賦

辭綜注

樂大已見西都賦凡人姓名及事易知而別

卷重見者云見某篇亦從省也他皆類此

西京賦

鵠

鵠已見西都賦凡魚鳥草木皆不重見他皆類此

同上

舊有集注者並篇內具列其姓名亦稱臣善以相別

他皆類此

甘泉賦

藉田西征咸有舊注以其釋文膚

淺引證疏略故並不取焉

藉田賦

班婕妤擣素賦佇

風軒而結睇對愁雲之浮沈然疑此賦非婕妤好文行  
來已久故兼引之

雪賦

未詳注者姓名摯虞流別題

曰衡注詳其義訓甚多疎略而注又稱愚以爲疑非衡  
明矣但行來已久故不去

思元賦舊注

引應及傳者

明古有此曲轉以相證耳非嵇康之言出於此也他皆  
類此

琴賦

此解阿義與子虛不同各依其說而畱之

舊注既少不足稱臣以別之他皆類此

李斯上書

昭

明刪此文太略故詳引之令與彈相應也

奏彈劉整

文選注義例

黃氏日鈔九十卷有文鑑注釋序云惠陽史君師始昉  
爲之凡國朝之典故諸賢之出處世道之升降無不瞭  
然於其閒惜其書不傳竊謂姚氏唐文粹多取古藻蓋  
隱以續文選也儻能注釋其功更倍於文鑑不知世有  
從事於此者否

宋文鑑注釋

季父學士公督學閩中以通經實踐訓多士求得儀封  
張清恪所刻書及西山先生大全集李文貞遺書以歸  
嘗命衍石兄云金玉玩好汝父本不有有亦勿之愛書  
數千卷吾節廉俸所買亦未嘗取非其有是吾之布帛  
菽粟也子孫受之其無飢寒乎兄誌之正誼堂叢書編

目後族子恬齋方伯嘗爲泰吉言山西某郡守眾以爲能吏恬齋不謂然適恬齋有小疾郡守奉文端公少宗伯公書畫卷冊來恬齋閱之意甚適旣而曰此巧於嘗我也謝卻之恬齋蓋亦恪守其祖父少宗伯公檢討公之遺訓以清慎著稱也偶讀衍石兄文憶及恬齋語謹識之以見取非其有書畫與金玉同爲黷貨也我子孫其慎守家誠而毋忽

學士公遺訓

張清恪所刻書未有總目衍石兄以清恪所居名之曰正誼堂叢書始於二程文集終於道南源委凡若干部二百數十卷

暇常錄  
細目

道光辛丑金岱峰於臨安故家得

若干部中若二程粹言二卷近思錄十四卷續近思錄

十四卷學規類編二十八卷陸宣公四卷韓魏公二十

卷范文正九卷謝疊山二卷陳克齋五卷吳朝宗四卷

胡敬齋三卷曹月川一卷楊椒山二卷熊愚齋八卷諸

先正集及呂氏童蒙訓三卷方正學幼儀雜箴一卷仕

學膚言一卷滇南炳燭編一卷百警編一卷皆桓臺小

柴桑誦誦錄一卷陶士大戒一卷呂古今訓蒙成法一

卷諸儒訓蒙詩一卷皆林又清恪自著塾講規約事宜

一卷小兒語好人哥一卷為季父所未得因寄贈衍石

兄岱峰又得清恪公年譜為公子師杖師載所編輯敘

公著書刻書頗詳公所自著者為學規類編養正類編

皆撫閩時初建鰲峰書院刻以教士者又有道統錄家

規類編濂洛風雅濂洛關閩書集解續近思錄集解廣

近思錄集南軒東萊勉齋及薛胡羅諸先生語諸儒講義葉刻宋元及近

義月刻不采入續伊洛淵源錄二十卷皆得朱子之傳者養正先

資訓蒙詩選凡若干種編刻先儒之書則曰立德部文

集以周程張朱之集為宗楊龜山尹和靖謝上蔡羅仲

勿軒陳克齋皆學考亭之學元許魯齋明薛敬軒胡敬

源一軌於正故并列焉其餘諸儒立功部文集漢諸葛

之書所未見者將次第訪求續入立言部文集韓柳歐曾

陸宣公宋韓魏公范立言部文集韓柳歐曾氣節部文



集

文文山謝疊山方正學

名儒粹語部

二程語錄二程粹言朱子語類

朱子學的上蔡語錄薛敬軒讀書錄胡敬齋居業錄羅整庵困知記

凡五部是為初集後

又得二十一家文刻為二集

年譜未著其目又云編刻

崔後渠魏莊渠海剛峯汪仁峯蔡汝濱陳確庵陸桴亭

張楊園魏貞庵熊愚齋湯潛庵耿逸庵施誠齋吳徵仲

汪默庵應潛齋魏環溪文集

又選宋元迄本朝儒者

次第告成據所列凡十九家

又選宋元迄本朝儒者

之文與道相發明者為古文載道篇

年譜不著卷數余所得者為十八卷

他若濂溪先生全集陳北溪集李微之道命錄

備詳程朱生時

興廢身後追崇

陸清獻文集讀禮志疑讀朱隨筆松陽講義問

學錄

公將之閩撫任時過嘉興求得之以付梓并訂正年譜

張武承王學質疑陸

桴亭思辨錄程啟墩閑闢錄陳清瀾學部通辨玉峰諸

莊甫勤齋考道日錄

諸弟蒞甫力學至老不衰陸稼書嘗訪之公撫蘇時問其人已沒一子

年三十餘貧不能婚公命屬吏求儒家女妻之而選刻其書

皆先後傳刻者又若胡

伯玉泉河史閻嵩岳北河續記及自著居濟一得則官

濟甯道時所刻又自著白鹿洞學規衍義小學衍義

六卷以朱子小學之目為綱取經史嘉言懿行以實之性理正宗不著卷數四書

正宗

七十餘卷

學易編

六十餘卷

困學錄

二十四卷續

錄二十四卷

皆未授梓三朝名臣言行錄

約宋名臣言行錄前後集

續集別集為一集纂元臣起於本忠武王華黎迄於杜

處士瑛一百六人明臣起於徐武甯王達迄於劉新樂

侯文炳二百八十人總題三朝名臣言行錄已有定本

後散失惟存宋明兩錄各四卷元錄竟無存公欲補輯

未就則公在時稿已散佚矣右皆據年譜所敘錄者然若

余前所列呂氏童蒙訓以下各刻年譜皆未及則清恪  
所刻書雖其子孫亦多未見不能備錄也

張清恪所刻書

衍石兄罷官後兩廣總督盧肅敏公聘主學海堂課諸  
生爲專經之業定季課章程分句讀評校著述鈔錄四  
式粵士多所成就及主大梁書院屬當事捐置經史諸  
籍俾諸生誦習并次第刻所藏經部善本以補通志堂  
所未備名曰經苑兄有刻經苑緣起存集中已刻者宋  
司馬溫公易說六卷張氏根吳園易解九卷楊氏萬里  
誠齋易傳二十卷徐氏總幹易傳鐙四卷元黃氏澤易  
學濫觴一卷宋鄭氏伯熊敷文書說一卷黃氏倫尙書

精義五十卷趙氏善湘洪範統一卷傅氏寅禹貢說  
斷四卷王氏質詩總聞二十卷呂氏祖謙家塾讀詩記  
三十卷戴氏溪續呂氏讀詩記三卷王氏安石周官新  
義十六卷附二卷李氏如圭儀禮集釋三十卷釋宮一  
卷唐陸氏淳春秋集傳纂例十卷春秋微旨三卷宋蘇  
氏轍春秋集傳十二卷朱子孝經刊誤一卷明呂氏維  
祺孝經本義二卷或問三卷孝經翼一卷宋鄭氏汝諧  
論語意原二卷元許氏謙讀四書叢說七卷宋熙時子  
孟子外篇注一卷元熊氏朋來瑟譜一卷助剗劖資者  
爲聊城楊至堂河帥以增貴筑張曉瞻方伯日晏安邱

王素園廉訪簡孝感劉鵠仁學使定裕滿洲庚子仙觀  
察長南昌陶松君觀察福恒杭州俞雲史太守焜漢陽  
鄒松友司馬堯廷也版存書院庚戌初夏兄謝世此事  
遂已所定目若吳陸氏續易解晉干氏寶易解宋陳氏  
經尙書詳解蘇氏轍詩經傳嚴氏粲詩緝朱子儀禮經  
傳通解黃氏幹等續儀禮經傳通解黃氏震讀禮記日  
鈔元吳氏澄禮記纂言宋陳氏祥道禮書陳氏暘樂書  
胡氏銓春秋集善高氏閔春秋集注陸氏佃爾雅新義  
賈氏昌朝羣經音辨楊氏伯岳九經補韻司馬溫公切  
韻指掌圖明邵氏光祖切韻指掌圖檢例皆不及刻

衍

石兄刻經苑

衍石兄曾藏宋巾箱本九經後失之時以爲念兄聚書  
數萬卷皆數十年節衣縮食而得之者宋本岳倦翁棠  
湖詩稿先世舊籍也有跋在記事稿中甲寅春余於蔣  
生沐處見汲古閣影宋鈔棠湖詩稿及錢塘何應龍子  
翔橘潭詩稿霄川吳

下空一字

仲孚菊潭詩集壺山許

棐忱父梅屋詩稿融春小綴梅屋雜著梅屋第三稿第  
四稿梅屋詩餘皆精絕四稿後有朱文方印云趙文敏  
公書卷末云吾家業儒辛勤置書以遺子孫其志何如  
後人不讀將至於鬻頽其家聲不如禽犢若歸他姓當

念斯言取非其有无甯舍旃凡五十六字閱之輒發慨  
歎夫所謂取非其有者巧偷豪奪也若子孫鬻之他人  
得之亦理勢所必然欲人舍旃何不達也梅屋雜著中  
有硯志云此硯雖不佳而愛踰金王者以先君舊物也  
能朝夕摩滌寫先君胸中未吐之書人硯俱不亡矣子  
孫守先人遺物能若梅屋之言則誠賢子孫矣然豈能  
必得哉生沐又有影宋鈔白氏諷諫亦精絕又宋刻杜  
詩補注不全本卷一第一行黃氏補千家注紀年杜工  
部詩史卷之一第二行前劒南下空數格杜甫撰第三  
行臨川黃希夢得補注第四行臨川黃鶴叔似補注卷

十五尾有國子監崇文閣官書印又云借讀者必須愛  
護損壞潮□□者不准收取印在紙背此則官書典守  
宜嚴非私家所可比例也

影宋本宋人小集宋刻黃氏

補注杜詩

曹倦圃有流通古書約有力收藏傳鈔者當取法焉大  
略云酌一簡便法彼此藏書家各就觀目錄標出所缺  
者先經註次史逸次文集次雜說視所著門類時代先  
後同卷帙多寡同約定有無相易則主人自命門下之  
役精工繕寫校對無誤一兩月閒各齋所鈔互換此法  
有數善好書不出戶庭也有功於先人也己所藏日以



富也楚南燕北可行也敬告同志鑒而聽許倦圃靜惕  
堂文集鈔本四卷亦生沐所藏又有諸草廬宮贊絳跗  
閣文集前有含山王善櫛跋似非全稿然亦尠傳本有  
志鄉邦文獻者當與靜惕集同鈔

曹倦圃流通古書約

生沐藏江陰周硯農手鈔鐵網珊瑚全部蓋從朱性甫  
精楷手寫本鈔錄者自跋大略云性甫手寫本舊藏姚  
宮詹現聞先生閩閣近世流入隱湖爲汲古閣中物老  
年目力未倦賈勇繕謄兩季卒業癸卯十一月十三日  
六十四老人硯農周榮起楷法頗似魏晉人到底不懈  
今余年與硯農同兩目昏花不作小楷久矣閱之增愧

硯農二女禧祐皆工畫禧尤著名此書後有嚴氏元照跋其得書之歲月則余始生之時也因詳錄之跋云辛亥孟冬有書賈王某攜朱存理性甫鐵網珊瑚十四卷求售紙薄而光新若未觸乃國初江陰周硯農手錄本硯農名榮起館於毛子晉家子晉所刻書籍硯農爲之校正見漁洋居易錄曾手錄王原吉梧溪集七卷歸漁洋漁洋跋云書學鍾太傅稍雜八分終卷如一一是書亦如之洵足寶愛後爲吾友知不足齋主人鮑以文先生借去季冬之月先生攜來見還自言家遭火厄是書僅而得免于爲之驚歎不已已翻看之餘追理先生之

言亟捉筆識其後廿六日芳椒堂主人嚴元照書

周礎

農手寫錢網珊瑚

苕溪嚴久能芳椒堂聚書數萬卷多宋元槧本所著娛親雅言錢竹汀宮詹爲之序爾雅匡名二十卷仁和勞君經原爲鋟之版前數年書估持校本山海經及說文至則久能之從子鼎臣萊俶氏所手校蓋受教於久能者山海經以盧抱經所校錄於吳氏廣注本說文則以段懋堂汲古閣說文訂細書簡端并依段注校正余收藏之

嚴萊俶校山海經說文

錢遵王藏說文繫傳託爲述古庫中驚人祕笈當明季

時所見說文皆李巽巖五音韻譜而始一終亥之本雖  
博覽如顧亭林猶不得見也自汲古閣大徐本流傳學  
者始得見許氏真本今仿宋之刻已有數本幾於家置  
一編繫傳則乾隆壬寅汪氏啟淑刻與石門馬氏巾箱  
本並行然觀卷後乾道癸巳尤氏表跋則宋時已多訛  
舛矣道光丁酉壽陽祁相國督學江蘇訪得顧千里所  
藏舊鈔本又得汪氏士鍾所藏宋刻僅見三十卷至四十卷與陳  
芝楣撫軍鑒捐資開雕寫楷書者爲蘇州蔣芝生篆文  
則江陰承培元吳江吳汝庚原闕第二十五卷顧氏鈔  
本據大徐本補入武進李申耆大令兆洛蒐采韻會等

書所引繫傳輯補詳於校勘記校勘記凡三卷河間苗夔江陰夏灝及承培元吳汝庚所纂也庚子秋日江陰季仙九先生督學吾浙分贈一部因得藏之亦詫爲書庫中祕笈相國序中謂附刻小徐篆韻譜則未之見篆韻譜余十年前曾從蔣生沐借閱手寫一卷以畏難輟業老年更難動筆矣

祁刻說文繫傳

秀水胡菊圃丈所錄惠松厓父子胡竹厂父子所校說文余旣識於前卷未暇傳錄得嚴萊俶所校本亦讀說文之一助也菊圃所校干祿字書以蜀石未損本校於傳寫揚州馬氏本岱峰贈余菊圃跋云顏元孫干祿字

書一在唐大厯九年甲寅顏真卿手書刻石於湖州刺史聽一在開成四年己未楊漢公及顏頤重摹刻石於湖州漢公有跋所謂湖本也一本朱紹興十二年壬戌宇文氏王司寇云是宇文時中重摹刻石於潼川郡庠句詠有跋今其石尙存潼川府所謂蜀本也一本寶祐五年丁巳陳蘭孫鏤版於郴州蘭孫有跋乾隆初年揚州馬日琯仿宋本重雕則所謂楚本也一在明崇禎十三年庚辰張延登鏤版於濟南延登有序并加案語又於每韻上標出部頭康熙五年丙午陳上年重雕於雁門上年有序顧炎武又加案語張昭爲之鳩工則所謂秦本今

四庫附存目有柏鄉魏裔介本與此正同也湖本既磨滅不傳蜀本二石雖存而下半斷闕二百餘字余外弟金十茂才松年出其大父檜門總憲手校本於韻部乖舛處一一籤識汪松泉尙書跋其後謂百年前舊搨余觀其楮墨精善一字不損卽如句詠一跋今存一百七十餘字其闕文三百餘字首尾具在王蘭泉司寇撰金石萃編亦未見全篇也此書於平聲列覃談在陽唐之前上聲感敢在養蕩前去聲勘闕在漾宕前入聲合益在藥鐸前亦如之又列蒸登在鹽添之後上聲拯等在儉忝後去聲證澄在豔祔後入聲職德在葉帖後亦如

之顧亭林謂唐初韻本有異而世傳女仙吳彩鸞所書唐韻適與之合未可執宋祥符廣韻以改之他如耕在青後錫在陌前又如泰在霽前隱準軫失次蓋唐刻如此不能曲爲之解也元孫承其伯祖師古家學訂譌辨俗又得魯公手書是以取重於世然其中亦有小誤處按說文虫音虺蟲从三虫各自爲部顏云虫俗蟲正非也𪛗音鄙卽𪛗𪛗字圖从口音从𪛗顏云𪛗俗圖正非也商从口帝聲凡𪛗適嫡皆从之商从尙音章省聲顏云商俗商正非也本音滔从大从十本从木一在其下顏云本通本正非也茲訓艸木多益从艸茲省聲俗體



作茲茲訓黑水从二玄顏云茲俗茲通茲正非也𠂔从  
匕音香訓穀之馨香又音急兒卽貌字从人从白顏云  
𠂔俗兒通貌正非也至若𠂔本从邑而以隣爲正虎本  
从人而以虎爲正𠂔本从艸音乖而以𠂔爲正𠂔劉皆从  
𠂔申酉不从𠂔寅卯而以𠂔劉爲正𠂔𠂔皆从𠂔又不从  
𠂔之酉而以𠂔爲正點畫小訛不勝枚舉聊拾一二以綴  
末簡云揚州本脫譌正嘉慶十五年冬十二月乙未望  
後學胡重謹志錄之以見菊圃丈研精小學之大略蜀  
石本余於咸豐元年四月得於杭州雖已斷闕猶是舊  
拓五月望對閱一過校正十餘字詳冊中

胡菊圃校于

祿字書

衍石兄少時嘗以爾雅十九篇之次寫說文五百四十部之文爲說文雅厭屬草未竟後以條例授長子子萬孝廉寶惠成之金壇段氏謂說文以形爲經義與聲緯之苟取義之相同相近者各比其類爲一書精密當過爾雅斯言也蓋與雅厭之作不謀而合子萬因名其書曰義緯自爲序例末附聲類二篇亦有序又別撰唐均聲類有序有略例尙有經韻廣證未成子萬能承我兄之學博綜經史而於聲音訓詁尤爲專精惜其壯年摧折未竟之緒當待其子矣我兄嘗語子萬之長子梈曰

說文義緯之作固爲小學津梁然汝父於古音覃心絕學有獨見處其言聲音歷久必變說文爲古本音三百篇爲周人音讀自不能盡合於本音云云乃其心得不可磨滅之論也今校刻衍石齋續稿牘請以子萬遺文附梓其自爲序例之文質之當世之學者可見其爲學之大略矣

兄子子萬所著書

余校漢書時子萬嘗錄呈其校正外戚傳二條蓋對我兄之問也其稿存余篋中錄之以見子萬讀書之精密大人言漢書外戚傳言傳太后丁姬改葬事何以不合惠攷哀帝紀建平二年六月帝太后丁氏崩詔起陵

其皇之園遂葬定陶四年尊帝太太后傳為皇太太后

八月其皇園北門灾元壽元年皇太太后傳氏崩外戚

傳傳太合葬渭陵元帝陵名定陶丁姬起陵其皇之園遣

丁明送葬定陶據此則傳葬渭陵丁葬其園紀與傳合

無可疑也丁為定陶其王之妾自無葬長安之理然與

元始五年王莽所奏不合者則其字有誤衍也今校正

詮釋如左 莽又言其王母丁姬前不臣妾指傳后事

兼丁姬言之耳至葬渭陵冢高與元帝山齊此專言傳太后懷帝太后

皇太太后璽綬以葬此又兼言丁傳傳卒在丁後故先

皆懷璽綬也不應禮承璽綬及冢與禮有改葬請發其王母

山齊二事言

及丁姬冢取其璽綬消滅此言二冢皆當發徙其王母及丁姬

歸定陶葬其王家次而葬丁姬復其故此衍及丁姬三字謂其王母宜

歸葬定陶而丁姬墓發取璽綬之後仍復其故以故在

共園不必徙也後以火災託言天意當改遂貶之勝委

之次可見初言復其故者正謂不必改葬耳既不改葬

則上文及丁姬三字斷為衍文御覽五百五十七禮儀

部引漢書外戚傳正無及丁姬三字是也其皇親大

部所引文有之者後人以誤本漢書校改之也

人又言平安剛侯夫人謁等董觀橋先生云表惟有安

平侯王舜子章諡剛非平安也竹汀先生云王舜所封

當是干乘之平安豫郡之安平則長沙孝王子所封二

說孰是惠按王章於成帝河平元年為右將軍陽朔四

年卒謁等祝詛事在鴻嘉三年距章沒四年耳以時攷

之剛侯爲王章無疑矣至章封邑漢表明作安平錢必改平安者漢地理志平安有二一廣陵一千乘千乘之

平安註侯國安平亦有二一涿一預章

此二字爲我世父戶部公諱子

萬故邇作預泰吉注

預之安平註侯國則平安安平皆有侯而王

舜與孝王子習同於元帝初元元年封自當一封平安

一封安平而表皆作安平必有一誤者矣而王章之爲

平安侯兩見於史記將相名臣表又見於此據以改表

說尙有當耳然漢侯國志有表無表有志無者不少則

志中千乘郡之平安國安知非表失其人而必求其人

以實之耶又安知非涿郡之安平與豫郡同爲侯國而

志失註之耶考證之難臆決類如此又鄂千秋楊敞皆  
封安平在前 漢侯國甚難攷錢據地志列一目全據  
三表次第列一目皆可也而不合處往往以形聲之近  
牽而合之大不可也惠欲更張之未得其條例姑俟異  
日 子萬校漢書外戚傳

余所藏文選評本不知文漪克紹爲何人識於前卷道  
光己亥仁和諸同伯甥渠曾語余文漪翁爲其伯曾祖  
名克紹雍正己卯舉人乾隆甲戌中明通榜任武義長  
興兩縣教諭有研北刪餘詩三卷刻入諸氏家集因以  
家集十卷見贈家集爲同伯大父撝堂方伯以謙官廉

訪時所刻阮文達公序云雪堂先生

名朝棟

於廉訪爲曾

祖其詩寬而和榕齋先生

名省三

於廉訪爲大父其詩純

而肆而硯北之詩清以峻者則廉訪之伯父也虛白之

詩名克任

麗以則者則廉訪之仲父也終之以浪迹草

名

以醕

其詩隱而秀華而不縟則廉訪之從兄也讀此序

可以知諸氏家學之大略矣虛白詩後附入山錄一卷

乃客處州時行記也

諸文漪錄文選評本

諸氏家集

往歲乙未秋寓杭州貢院西橋某氏有汪柏年者與其

弟挈妻子賃居焉中堂懸新羅山人爲柏年先世雲尺

先生畫照筆墨絕高余讀其題識爲之感歎柏年因出



謝文侯藍田叔爲雲尺曾祖然明先生合畫小像見示  
并贈上湖編修師韓所著書屬爲題詠諾之未果忽忽  
二十年矣柏年時年二十餘後聞客閩中有年今不知  
蹤跡如何因檢諸氏家集見柏年所贈書清門文采猶  
在心目間也然明先生名汝謙先世徽州歙縣崇睦坊  
人後遷於杭故爲叢睦汪氏春星草堂集五卷爲然明  
不繫園集隨喜庵集綺詠前集後集夢遊草西湖韻事  
聽雪軒集閩游紀事多崇禎時作然明卒於順治乙未  
年七十九隱居西湖朋簪遠集讀所往還投贈之什其  
豪情勝概可以想見又有夢香樓集皆然明同時人題

贈雲間校書張宛者也其六七卷爲延芬堂集然明之  
孫梅坡吉士鶴孫之詩第八卷爲詹詹集然明曾孫桐  
城知縣振甲之詩第九卷則雲尺重閭齋集也雲尺爲  
桐城之弟名德容雍正甲辰第三人及第授編修己酉  
謫安西乾隆己未卒故新羅畫上題識云己未十二月  
二十二日接積山書知雲尺先生於九月七日物故嗟  
乎去家萬里風日淒然蕭蕭黃野遊魂何依傷哉傷哉  
時先生第五子求僕繪父小像然僕與先生握別二十  
有餘年矣邇來鬚眉文采無從著擬因撫紙沈思得渠  
壯歲風流縈繞筆端而口之稍不失其清神雅致庶不

負孝子殷殷哀情也新羅同學弟華岩拜題柏年與余  
讀是跋敘當時舊事惜未及記柏年爲雲尺幾世孫亦  
忘之矣幸題識鈔存篋中因詳錄之以補負諾之過其  
第十卷則夕秀齋詩爲雲尺弟絳縣知縣援甲作上湖  
所著韓門綴學五卷續編一卷詩學纂聞一卷皆雜說  
之書也上湖爲然明元孫學極博綜自敘謂說部書有  
裨學問者宋之夢溪筆談容齋隨筆困學紀聞及我  
朝顧氏日知錄其所宗尙可知矣

叢睦汪氏所著書

丁酉之秋余始識上元朱述之於屠彼園所時述之將  
入闈分校不及過從及壬寅冬寓杭城與述之鄰方錄

金陵詩及注曹子建集相與商榷者旬餘戊申權知海  
昌始得縱觀所藏書述之鈔 文瀾閣宋元人集已得  
十之七八他所購藏甚富其尤愛賞者宋刻胡穉增廣  
箋注簡齋詩集三十卷無住詞一卷年譜一卷又續添  
正誤四葉雖半屬影宋鈔亦極精審有紹興改元臘月  
上澣竹坡胡穉仲穉自序前有樓大防序大略謂曉江  
胡君仲穉約屈力學日進不已得此詩酷好之隨事標  
注遂以成編吏部蘇公訓直愛其書屬余爲敘云云此  
注爲 四庫所未收愛日精廬藏書志及儀徵相國經  
進書目皆有之亦未詳竹坡生平事蹟也余擬助述之

編纂所藏書目未踰年述之調任嘉興遂不果後其書載歸金陵已付劫灰矣可爲痛恨但記有不全元刻巾箱本爾雅注每葉十六行每行十五字卷上釋詁釋言釋訓釋親卷下釋草釋木釋蟲釋魚釋鳥釋獸釋畜皆附音釋序後有木記六行云一物不知儒者所恥聞患乎寡不患乎多也爾雅之書漢初嘗立博士矣其所載精粗巨細畢備是以博物君子有取焉今得郭景純集注善本精加訂正殆無毫髮訛舛用鋟諸梓與四方學者其之大德己亥平水曹氏進德齋謹誌述之熟精爾雅文書遮眼猶能倍誦全篇不誤一字此爲案頭長置

之冊惜余亦未及取校簡齋集及此書不知尙存篋中  
否

朱述之所藏書

邵二雲爾雅正義近時讀爾雅者皆以爲善棲霞郝蘭  
臯戶曹懿行有爾雅義疏十九卷近歲兩江總督刻於  
金陵延長洲陳碩甫與校勘金陵蹂躪之後余未晤碩  
甫不知書版若何曾有印本否憶己亥之秋績溪胡竹  
村戶曹培輦寓西湖碩甫偕余往訪因得贈所著研六  
室文鈔中有郝蘭臯先生墓表其述爾雅義疏云先生  
嘗曰爾雅邵氏正義蒐輯較廣然聲音訓詁之原尙多  
壅閼故鮮發明今余作義疏於字借聲轉處詞繁不殺

殆欲明其所以然言之既多有得必有失矣又曰余田居多載遇草木蟲魚有弗知者必詢其名詳察其形考之古書以徵其然否今茲疏中其異於舊說者皆經目驗非憑胸臆此余書所以別乎邵氏也先生之於爾雅用力最久稿凡數易垂沒而後成於故訓同異名物疑似必詳加辨斷故所造較邵氏正義爲深錄之以見郝氏爾雅義疏之梗概竹村邃於儀禮因賈疏漏略重爲義疏不知已刊行否碩甫毛詩疏三十卷印行數年矣碩甫講西漢之學其爲毛詩疏始於甫成童時蓋鑽研四十年而後成也郝氏山海經箋疏十八卷圖讚一卷

後附訂譌敘錄炳森應溥自京攜歸其攷訂精密亦在

吳氏廣注畢氏校本之上

郝蘭皋爾雅義疏

錢唐汪小米舍人遠孫與余有校史之約惜其早世未能成小米所校漢書地理志極精審與大興徐星伯松

西域傳補注

衍石兄以刻本畀余

可以並傳其於國語用力尤深

嘗輯賈氏達虞氏翻唐氏固之說爲三君注輯存而以王氏肅孔氏晁兩家附焉凡四卷於韋氏注則解譌者駁之義缺者補之辭意有未昭晰者詳說之搜輯舊聞博求通語苟可明者皆收錄焉爲發正二十一卷又以公序本校明道本凡他書所引之異文及諸家所辨之



異字亦皆慎擇而采取之爲明道本攷異四卷歲丙申  
小米卽世其弟亞虞延陳碩甫於家爲編定遺草碩甫  
亦得自定所撰毛詩疏皆亞虞主之也癸卯冬亞虞又  
沒小米之子曾撰年少好學歲甲辰亦卒碩甫感念故  
交不負委任力爲小米編定所著書閱數年而成亞虞  
之弟少洪乃延吳門蔣芝生爲繕寫授梓亞虞名适孫  
小洪名邁孫皆與余善少洪今亦下世其子曾本於辛  
亥得鄉舉汪氏詩書之澤當未艾也

汪小米所著書

道光初元 詔天下臣民嚴冠服之辨乾隆壬午舉人  
前江西崇仁縣知縣順天通州雷鐔乃撰古經服緯三

篇以申古義抑奢侈其子嘉慶甲戌進士山西和順縣知縣學淇爲之注釋以行後附釋問一篇異同表二篇則學淇所論次也書成於九年四月崇仁已九十矣己酉夏崇仁之孫樹芝來權許村場大使十二月初受代將去乃出以見贈并贈和順所著夏小正經傳考二卷本義四卷經傳考上卷考定經傳之文下卷錄諸家論說而以己意斷之本義則考定經傳之文而爲疏證又考訂竹書紀年十四卷其前六卷爲考訂其後八卷則辨誤一卷考證一卷年表二卷厯法天象圖一卷地形都邑圖一卷世繫名號圖二卷又校輯世本二卷上卷

世繫一王侯二卿大夫三氏姓四諡法五居六作七又  
古經天象考十二卷一元紀原始二三觀象四亨紀循  
斗五六定法七八九利紀治厯十貞紀布憲十一述徵  
十二演緒每篇各有子目采錄古書而以己意發明之  
後附圖說二卷大使云書成於官貴州時後數年重刻  
於家更定數十條此則貴州刻本也和順尙有竹書紀  
年義證四十卷亦囂囂齋文集三十二卷稿本在大使  
篋中惜其臨別始言之不及一見也

通州雷氏所著書

親家沈曉滄贈余上海郁泰峰松年宜稼堂叢書藏之  
數年矣上海近被兵泰峰困危城中書版恐難保其所

刻皆有札記因詳錄之 清容居士集刻於道光二十年序云先府君辛苦成家督子孫力田讀書伯兄竹泉器識高亮以余性好聚書不惜重貲購善本任余丹鉛嘗命仿前賢醵刻諸書仰承先志乃以是集爲權輿續刻諸書則以付梓歲月爲先後云札記序云清容居士集不知刻於何年字體秀整雅潤出一手明永樂間此本已殘闕有王君肆爲釐正之末附諡議及墓志銘已是寫本毛君生甫得嘉定錢少詹精鈔校本有與原本違異足證原本舛誤余幸其可據凡本脫衍淆譌輒以刪易增補疑者存之至兩本脫誤同者率條列之間附

臆見庶爲博攷者一助云 剡源集三十卷亦道光二  
十年刻札記序云余旣得清容居士集元槧本刻之清  
容爲戴剡源弟子剡源集無論明初刻本卽嘉靖間周  
儀菟輯者亦殘闕不易得余家所藏卽黃梨洲先生選  
錄不全本蓋是集幾淹久矣今所刊三十卷者寶山毛  
生翁得於武進李申耆太史太史得於同郡趙味辛司  
馬司馬則得於湖州鮑以文孝廉家司馬跋云是書爲  
竹垞秋岳兩先生藏本鮑君亦嘗校之今觀書中回易  
刪加朱墨爛然皆無主名不能分別某者爲何氏其明  
確者旣胥從之而意有未安亦勿敢徇 宋蕭氏常續

後漢書四十二卷義例一卷音義四卷道光二十二年  
刻札記序謂昭文張氏墨海金壺刻本錯誤衍脫幾不  
可讀是書一本陳志及裴氏注偶參范氏後漢書音義  
有旁引他書者悉爲檢核原文又證以通鑑郝書及三  
國志辨誤考異諸書因張氏舊本正其謬誤云 元郝  
氏經續後漢書九十卷亦二十二年刻成札記序謂原  
編殘闕傳寫益譌爰取陳志參以范史晉書綜覈槩正  
其博涉他書及荀氏注館閣原校所徵引壹檢其本自  
庚子仲秋迄壬寅季春始克蕝事札記刊未畢嘆夷不  
靖大懼是書之散亡夷氛息鳩工卒事 宋秦氏九韶

數書九章十八卷亦二十二年刻成宋氏景昌札記泰  
峰序云秦道古數書元和沈廣文欽裴曾得明人趙琦  
美鈔本於陽城張太守敦仁家訂譌補脫有年其弟子  
江陰宋君景昌傳其學余屬毛君生甫索得其副於武  
進李太史兆洛家毛君又出元和李茂才銳所校 四  
庫館本并屬宋君爲之讐校廣文沒後宋君又於其家  
得秦書刊誤殘稿於是以趙本爲主參以各本別爲札  
記 宋楊氏輝詳解九章算法亦二十二年刻札記序  
謂楊氏自序詳解八十題總十二卷今乃九十七題不  
分卷蓋非原書九章世傳永樂大典孔氏微波二本均

不免脫譌鍾祥李尙書細草圖說多所改正往往與此書暗合因屬宋君勉之取孔李二本校其譌脫別爲札記 楊氏輝田畝比類乘除捷法二卷算法通變本末卷上乘除通變算寶卷中法算取用本末卷下共三卷續古摘奇算法一卷總名之曰楊輝算法亦二十二年刻札記序云於市肆間超徑等接之術採摭略盡故續刊於其所著詳解九章之後屬宋君勉之爲之校覈并作札記聞朝鮮尙有傳本尙能使闕者得完不憚重爲鳩工也 數年前泰峰得宋刻魏鶴山詩經要義屬曉滄助校勘將授之梓卒遇變亂不知宋刻猶存否以上



諸書幸已流行藏書家慎勿以新刻易得漫置之此後  
恐印本日希矣 上海郁氏叢書

余少讀潛研堂集嘉定嚴永思衍傳心冀一見資治通  
鑑補後讀 國史儒林傳稿永思與歸安沈東甫同傳  
竊謂東甫新舊唐書合鈔及廿一史四考查氏既傳刻  
矣嚴氏之書不當終晦壬子九月邵武楊渺滄翁以其  
友江夏童氏活字本資治通鑑二百九十四卷刊誤二  
冊託售見之狂喜力不能得乃屬蔣寅昉光燾藏之童  
氏印書跋云明季嚴永思先生著通鑑補積四十年之  
功卷帙浩繁未經刊刻聞陽湖張氏有鈔本亦未之見

先君覘得此稿珍如至寶曾與儀徵吳熙載劉孟瞻諸君商酌付刊嗣因攝篆兩淮未竟其事豫等讀禮家居謹用聚珍版鳩工成帙勉力繼志但鈔寫本多錯誤而印工恩迫校勘難精爰附刊誤二冊俾閱者備查咸豐元年仲冬江夏後學童和豫識每卷前有瓶花書屋童氏藏本八字卷尾有童和豫偕弟和豐和謙校十字聞所印止一百部童氏寓家吳門其別業在金陵揚州兩地蹂躪之後儲藏多盡所印百部未知盡散播否余幸得屬寅昉收藏餘年有暇尙當一讀親家許珊林云童石堂濂權兩淮運使時曾謹遵王伯申尙書奉旨校

勘康熙字典摹刊極精惜未竣工今亦不知存否矣 嚴  
承恩資治通鑑補活字本

宋淳熙中興禮書嘉泰續纂中興禮書詳玉海禮制門  
其書失傳久矣大興徐星伯太守松官翰林時從永樂  
大典采輯成帙我家味根大令聚仁在京師曾見之後  
官四川購於成都書肆中蓋星伯以付龍觀察元任俾  
以其家活字本印行觀察旋卒不果成此書束置書肆  
遂爲味根所得攜以歸友人多從傳錄者蔣寅昉光燭  
亦錄一部壬子之歲沈曉滄借觀因詳記缺卷之目於  
其卷首錄之以質藏書家不知尙可輯補否 中興禮

書正編三百卷

目錄中一百四十一卷脫寫應補

一卷至一百七十二

卷為吉禮

缺卷三卷五卷十七卷二十一卷八十七卷至

至一百二十四卷

九卷九十六卷至九十八卷一百一十二

三至一百四十八卷

一百一十三卷一百四十二

卷一百六十一卷

一百五十一卷一百五十三至五十七

六至六十八卷

一百七十一卷一百七十二

三卷至二百二十二卷為嘉禮

缺卷一百七十二至九

八卷二百一十一至十四

二百二十二卷至二百十九卷

為賓禮

缺卷一百二十四至二十六卷二百二十三

卷至二百三十五卷為軍禮

缺卷二百三十五

三百卷為凶禮

卷數續編八十卷一卷至十三卷為吉

禮

缺卷四卷十卷十一卷之半卷十二

十四卷至三十卷為嘉禮

缺卷二十三至

禮

缺卷四卷十卷十一卷之半卷十二

十四卷至三十卷為嘉禮

缺卷二十三至

禮

缺卷四卷十卷十一卷之半卷十二

九三十一卷至三十四卷爲賓禮全三十五卷至八

十卷爲凶禮卷數無缺曉滄謂中有松案云云間注於條下

又有燕案云云不知何人書中修改挖補歲久脫落零

星散亂鈔胥不能一一校正前後倒置在所不免尙須

覓精鈔之本讐校也中興禮書續中興禮書

王信所撰太常中興禮書序略云淳熙七年七月通直

郎秘書省秘書郎兼權禮部郎官范仲藝奏請將中興

以來已行典禮令太常寺卿少博士丞簿講求比次編

類成書仍命大臣兼領其事八年二月承議郎行太常

寺主簿陳賈奏乞令禮部長貳同共刪修十一年七月

告成自建炎以至清熙所行郊祀明堂朝獻親饗耕藉  
高禩內禪登寶位上尊號慶壽聖節朝會冊命后妃皇  
太子駕幸秘書省太武學應太慶典禮及祭祀儀式樂  
舞器服制度等總之爲三百卷分爲六十八門葉宗魯  
續編序略云嘉泰二年八月二十日准尙書省劄子中  
奉大夫權禮部尙書兼實錄院同修撰兼給事中費士  
寅通議大夫守禮部侍郎兼修玉牒官木待問朝奉郎  
行太常寺主簿葉宗魯劄子檢准嘉泰元年九月二十  
七日臣僚上言節文中興禮書卷帙甚盛無不備載尙  
有孝宗一朝所有典禮至今未曾接續修入可謂闕典

臣向者備數奉常末屬備見始末案牘無一不存切慮  
日後散失欲乞陛下因時制禮下臣此章令禮部太常  
寺日下編類舊牘接三百卷以後修纂成書以永其傳  
亦使臣下見之不生異議其於孝治尤非小補取進止  
九月二十七日三省同奉聖旨依禮寺除已編類舊牘  
將孝宗皇帝一朝典禮接續修纂成中興禮書續編八  
十卷今已繕寫行投進伏望朝廷敷奏取旨施行候指  
揮八月十七日三省同奉聖旨依令禮部太常寺繳進  
云云錄之以補玉海所未詳玉海所載尙有嘉定十一  
年李琪奏請編纂慶元元年以後典禮不知有成書否

我兄衍翁言曾見永樂大典所錄有宋會要惜未能鈔  
輯嘗擬請重搜永樂大典中未經采輯之書與館閣諸  
公商定將上奏矣會有軍事不果

王信葉宗魯禮書序

畧

吾兄雲壽廣文械自少熟精

欽定諸經及古注疏摘錄精要積數十冊皆端楷不苟  
泰吉愧不能及也吾鄉數十年來專精經學記誦淵博  
以吳君雲翰爲最吳君長余殆逾二紀嘉慶甲戌乙亥  
歲科試與張堯民昌衢馬珊林應潮沈蓮溪濂同試經  
解余亦得參末席吳君所作河源考大爲山陽汪文端



公所嘆異始得食餼晚年窮困出所纂輯經解將以易米雲壽兄見之亦歎其貫串賅洽爲不可及今聞經解稿本在其族孫慕周庶常仰賢處馬珊林之九經古義注則不知流傳何所矣噫皓首窮經而著述不傳終有名氏翳如之歎卽我鄉而論亦豈少哉憶歲乙酉表弟徐湘泉汝潮以王君廷桂所纂

欽定儀禮義疏本示余後附爲所生祖母不得承重議二篇酌古準今信可補禮律所未備余鈔存篋中王翁之子伯熙與余同爲縣學生謝世久矣義疏摘本不知有人收拾否我兄所纂輯之冊兄子廷壬尙能寶藏吳

君稿本在其族孫所以視王馬兩君差爲無憾云

雲壽

兄及同時諸君經學